

568967

欽定剿平三省邪匪方略

正編

十一
十一
一

卷之三

三

三

欽定剿平三省邪匪方略正編卷二百五十八

辛酉年

五月二十二日丁酉勒保奏言查湯思蛟劉朝選

辛聰等逆自與藍號王士虎餘黨合夥後分屯

萬古寺核桃壩一帶該處俱係深山老林路徑

叢雜該匪等或分數百人或百十人零星屯踞

綿延百餘里意圖牽綴我兵臣與七十五公同

酌定臣帶同阿哈保永寧等由蕭家河節籬坪

一路進發七十五一路由葱子壩木旺坪進發

初五日

臣

於午後兵抵篩籬坪卽遇望哨賊匪

當卽趕緊追擊隨剿隨進賊匪人數較衆紛紛

拒敵我兵斃賊多名進抵火鑱埡將及酉刻遙

聞隔山鎗礮之聲探係七十五由木旺坪一路

兜剿前來

臣

鼓勵兵勇奮力剿殺追近萬古寺

右邊山梁見七十五官兵已將左邊山梁搶佔

賊匪不能抵敵向後面大山翻越而逃該處係
萬山之中時已昏黑難以窮追統計兩路殺賊
五百餘名滾崖落澗者甚多生擒一百六十七
名獲賊旗十三桿刀矛二百餘件騾馬三十四
頭匹訊據活賊麻有才等供稱萬古寺之賊本
係藍號王士虎餘黨王士萬後來湯思蛟劉朝
選辛聰等由尖山壩逃來合夥又有從湖北竄

來之藍號李姓冉姓亦來會合分屯萬古寺核
桃壩一帶內有戰手吳榮等五十九名當卽正
法餘係被擄未久難民概行給票省釋連夜差
探回報藍號賊匪王士萬並李姓冉姓由湯家
壩桐油壩竄去白號湯思蛟劉朝選黃號辛聰
向家當灣天坪奔逃並據防守大寧鹽場之遊
擊劉貴朝都司沙念聖節次稟報又有楚省竄

來白號張姓股匪在香冲鐵瓦寺一帶滋擾有

窺伺大寧鹽場之勢

臣

查大寧鹽場人煙稠密

數年以來從未遭賊蹂躪刻下湯思蛟等逆距

香冲等處甚近勢必與張姓股匪合夥設或闌

入鹽場所關匪細當卽飭令阿哈保永寧等卽

由天坪一帶緊躡湯劉等逆前進

臣

督同侍衛

花品塔什拉副將倭星額等抽帶兵勇由大寧

鹽場一路率同劉貴朝等迎擊並令七十五

由桐油壩烏龍溪追剿藍號匪衆

臣

於初七日

由鹽場行抵蛇條嶺卽有賊匪數百人前來探

信經我兵趕上殺賊三十一名生擒十八名餘

卽遁去我兵追至香冲適阿哈保永寧等帶兵

亦從天坪追來該匪等見兩路有兵卽由鐵瓦

寺廟埡子苦竹壩前竄

臣

督同阿哈保永寧等

連日冒雨緊躡初九日直抵徐家壩沿途逃出
難民甚多殺賊一百八九十名生擒七十四名
訊據獲賊劉仁貴等供稱湯思蛟等已與張姓
合夥原要由鹽場下壩搶割麥子先派戰手五
百人探信不想遇著官兵他們要從萬家坡核
桃園到川楚沿邊老林藏躲餘無要供均即正
法並接七十五知會由烏龍溪追抵龍灘河沿

途殺斃賊匪五六十人難民逃出一百餘人並
稱探報藍號賊匪有由一碗泉竄往陝省茅壩
之勢該提督已督兵緊追臣亦督同阿哈保永

寧等卽帶兵由徐家壩趕緊追擊以冀痛加剿
洗至龍紹周股匪前據託雲泰稟報竄至後坪

一帶近又據稟報龍逆剿散餘黨已向楚省老
林遁去惟四月二十九日有賊匪一股攻撲南

溪叅將李芝榮營卡經該叅將督兵擊退斃賊

十餘名生擒六名據獲賊周紹宋等供稱係苟

姓股匪同藍號李姓等從湖北竄來在大寧境

內分夥苟姓走平溪河來衝南溪營卡等因

臣

現已飛飭該鎮設法剿辦其川北一路近據通

江廣元稟報各該境沿邊俱有陝省竄來剿散

餘匪在彼滋擾

臣

亦飭候補道劉清督率地方

官策勵鄉團各勇實力截擊並飭沿江文武一體加意嚴防奏入

上命軍機大臣傳諭勒保曰湯思蛟等與王士虎餘黨合夥分屯萬古寺核桃壩一帶經勒保與七十五兩路截殺雖殲擒五六百人究未能擒獲首逆而湖北藍號李姓冉姓白號張姓賊匪又任其竄入川境與湯劉等逆合夥總緣辦理遲延所致從

前賊匪屯聚馬家營時賊勢尙少且困守在彼正
可乘機殲洗乃屢次因循以致賊股又復竄合卽
云彼時接據經畧額勒登保知會剿辦高馬等逆
亦應另派鎮將前往協剿勒保何竟舍現辦之賊
轉欲越境剿辦他股况又未能追及耶勒保在川
帶兵時稱馳往川北時稱移師川東非止一次似
此東奔西逐實屬心存恇怯故意耽延前此勒保

辦理狃苗甚屬奮迅及用爲總統剿辦教匪其奮
勉已不如前至授爲經畧後惟知安坐達州竟毫
無展布是以將伊革職治罪嗣經朕棄瑕錄用仍
畀以四川總督帶兵剿賊原望其立功贖罪乃勒
保有鑒於前此安坐獲咎僅以奔馳道路卽爲勉
贖前愆不知往返徒勞於事何益此時川省築立
堡寨俱極完密百姓各知固守賊匪無可掠食自

應日就解散何以本境湯劉等股未經剿淨復有
楚省藍白等號乘間闖入總由賊匪時時探聽帶
兵大員聲威素著者卽預行遠避其畏葸不前者
賊亦肆無顧忌相率竄入朕屢閱勒保奏報均係
敷衍浮詞卽知其庸懦無能訓飭不當至再至三
今竟至爲賊匪所輕咸思聚集川境苟延殘喘勒
保尙不知愧勵耶現在薛大烈患病未愈德楞泰

一時亦不能來川勒保務當會同七十五將境內
之賊於夏令一律肅清剿除淨盡勉之至通江廣
元邊境有陝省竄來剿散餘匪勒保現飭劉清督
勇截擊此股賊匪想卽係日前長麟所奏竄往川
境之高見奇股匪該處既有劉清堵剿勒保不可
又舍湯劉等逆去而他顧也

同日

上命軍機大臣傳諭各路帶兵大員曰各股竄匪中
被裹良民實居大半此等良民一經裹脅卽被賊
匪用繩拴縛髮辮並面刺蓮花以爲記號使之不
能投出而抗拒官兵時又將良民逼令前敵至官
兵剿捕賊匪祇期痛加殲戮自不暇分別良莠往
往臨陣多有殲斃此雖倉猝之間死於官兵鋒鏑
實賊匪逼令在前置之死地目前賊中首逆如徐